

«Sí, se puede»

Il Puerto Rico tranter Clinton ed Obama

DA GUIU SOBIELA-CAANITZ

■ **Dumengia, chalanda zercladur tschernan electuras ed electurs da Puerto Rico las 63 personas che duain represchentar lur «estado libre asociado» a Denver/Colorado tar il di da la partida democratica (pd).** Lezza radunanza duai lura determinar tgi che represchenta la pd en november tar l'elecziun presidenziala dals Stadis unids (Su).

Las vuschs dals strusch trais milliuns «puertorriqueños» paيسان dapli che quellas da 28 stadis da la federaziun, schizunt che quellas dal vast Alaska (mo 670 000 olmas). Da november dentant n'astga il pievel dal Puerto Rico e da sias tschintg «islas pequeñas» betg tscherner tranter il candidat republican senatur *John McCain* ed il u la «nominee» da la pd.

Ils «puertorriqueños» possedan il dretg da burgais dals Su, ma senza quel da vuschar per eleger la persuna che duai occupar la Chasa alva; per la paja n'eni betg suttamess a las taglias federalas sin las entradas.

Renunzia finalmain la senatura?

L'insla dal Puerto Rico e sias trabantas (8959 km²; Grischun: 7105 km²) è situada tranter l'Ocean atlantic ed il Mar da las Antillas, a l'ost da la Republica dominicana. La Castiglia l'ha colonisada davent da 1508; la Spagna l'ha cedida 1898 als Su. Las elecziuns aifer la pd na muntan en sasezzas nagut per il resultat final da november, ma i pon avair ina relevanza simbolica. Ils «puertorriqueños», sco la blera glieud da linguatg spagnol en ils Su, vuschan tradiziunalmain cunter ils nairs; quai ha sa mussà en California, nua che blers impiegads «latinos» da la gastronomia han premdi posiziun cunter lur sindicat che sustegneva senatur *Barack Obama*. Ina victoria da senatura *Hillary Clinton* en il Puerto Rico sminuiss l'avantatg da ses concurrent areguard il dumber dals delegads elegids. Perquai na vul la candidata anc betg renunziar, schebain ch'ella sa strusch pli cumpensar ses dischavantatg cun atgnas forzas. Ella para da sperar ch'in schabetg dal davos mument persvadia tuttina sia partida da l'eleger candidata. Forsa spetg'la anc che fermas pressions politi-

cas sforzian il senatur da la surpigliar sco candidata a la vicepresidenza; ma la victoria d'in «ticket» Obama-Clinton en november manass in «triangul» politic zop, perquai che vegl president *Bill Clinton* avess en dapertut il nas. Ina terza vista da la senatura pudess resultar d'ina victoria dal veteran McCain en november; en quest cas pudess'la anc sperar da candidar dal 2012 per al remplazzar. Ma tge valan tals chastels en l'aria? En mintga cas tschertgan Clinton ed Obama dapì dis la favur d'ina cuminanza periferica che na po tuttina betg vuschar en november. La devisa dal senatur: «Yes, we can» tuna per spagnol: «Sí, se puede». Suentar il Puerto Rico sto la pd mo pli decider en ils dus stadis da Dakota dal sid e Montana (781 919 e 944 632 olmas). Pli probabla para finalmain la «nomination» dal senatur. Sia concurrenta victorisada pudess lura surpigliar la direcziun spiertala da la partida en il senat, oramai che ses collega renumà *Edward Kennedy* (76) sto sa retrair da la politica pervi d'in tumor dal tscharvè. Dentant vivan ils Su in cumbat electoral plain tensiun excepziunala.